

Di Sekant Leta weh di Apasl Paul Rait tu TIMOTHY

Weh dis buk deh taak bout

Dis dah di laas leta weh di Apasl Paul rait. Ih luk laik ihn rait dis leta afta ihn forth mishonery trip deh priich di Gud Nyuuz. Ihn rait'ih wail ihn wende iina prizn dah Rome. Muos a di leta dah advais tu Timothy, bikaaz ihn stil yong. Di muos impuotant ting dah Timothy no fi gi'op. So, Paul inkorij Timothy seh, ihn fi kiip aan deh tel di pipl dem bout Jesus Christ ahn fi huol aan tu di chruu tiichin a di Gud Nyuuz, ahn di Uol Testiment wod dem. Ahn iivn duo Timothy deh sofa ahn di pipl deh gens im, ihn fi kantinyo fi du di work a wan ivanjelis ahn tiicha.

Den, Paul waan Timothy no fi get ihnself miks'op iina non fuul-fuul aagyoment weh no du no gud ataal, bot ongl distrai pipl weh lisn tu dem. Fi di laas Paul wehn waahn Timothy kom dah Rome, so ih kyan si'im wan laas taim. Ihn wende tel im huu ihn wehn fi bring wid im, ahn weh ihn wehn fi bring. Ihn wehn waahn si Timothy fi gi'im som laas inkorijment bout di work weh ihn fi du fi di Laad.

How dis leta set op

Introdokshan *1.1-2*

Priez ahn inkorijment *1.3-2.13*

Advais ahn waanin *2.14-4.5*

Weh Paul deh go chruu *4.6-18*

Paul laas wod dem iina dis leta *4.19-22*

Di Apasl Paul rait wan neks leta tu Timothy

1 ¹Dis leta dah fahn mii, Paul, weh dah wan apasl a Christ Jesus, bikaaz dat dah weh God waahn Ah fi bii. Ihn sen mi fi go tel evrybady bout di laif weh ihn wehn pramis fi gi wi ahn weh wi gat bikaaz wi dah wan wid Christ Jesus.

²Ah deh rait tu yu, Timothy, weh dah laik mi son weh Ah lov.

Ahn Ah deh prie seh God, di Faada, ahn di Laad Christ Jesus wuda gi'yo plenty gries, morsy ahn piis iina yo haat!

Paul inkorij Timothy

³Timothy, mi son, Ah aalwiesz memba yo iina mi praya dem. Die ahn nait Ah gi God tanks fi yu, az Ah deh sorv di Laad wid wan kliin kanshans, jos laik weh mi ansesta dem yuuztu du. ⁴Ahn, Timothy, Ah memba how yu wehn krai, wen Ah wehn hafy lef yo. Ahn dat riily mek Ah so lang fi si yu, so mi haat kyan ful'op wid jai agen. ⁵Ah memba how yu chros iina God wid aal yo haat jos laik how yo granmada, Lois, ahn yo muma, Eunice, yuuztu du. Ahn now, Ah nuo seh yuu tu gat di siem fiet fi chros God jos laik dem. ⁶Dat dah wai Ah deh remain yu fi kiip aan deh yuuz di gif dem weh God wehn gi'yo, wen Ah put mi han pahn yo hed ahn prie fi yo. ⁷Memba seh: di Spirit weh God gi wi, no mek wi fried! Insida dat, ih mek wi strang fi du God work. Ih put lov iina aala wi haat, ahn mek wi kyan kanchruol wiself tu.

⁸So den, yu no fi shiem fi tel di pipl dem bout wi Laad, nar shiem fi mii niida, weh now deh iina prizn sieka di Laad. Bot, yuu fi sofa lang wid mi sieka di Gud Nyuuz, az God gi'yo di strent fi du'ih. ⁹Memba, God siev wi ahn kaal wi fi bii ihn uon pipl. Ahn ihn no kaal wi bikaaz a notn weh wi du, bot fi sieka weh him wehn plan fi du wid wii ahn bikaaz a ihn gries. So, bifuor taim iivn staat, him wehn don gi wi dat gries chruu Christ Jesus. ¹⁰Ahn now, God gi wi fi him gries wen wi Sievya Christ Jesus wehn kom. Him distrai di powa a det, ahn chruu di Gud Nyuuz ihn mek plenty pipl nuo bout dah laif weh neva gwain don nontaim ataal.

¹¹God don pik mii fi tel di pipl dem evrywie dis Gud Nyuuz ahn ihn sen mi fi bii wan apasl ahn wan tiicha tu dem. ¹²Dat dah wai Ah stil deh sofa demya tingz. Bot Ah no shiem ataal, bikaaz Ah nuo di Wan weh Ai chros iina. Ahn Ah shuor seh him gat powa; ahn dah him gwain kiip sief aal weh Ah deh chros im fah til Dat Die wen ihn kom bak!

¹³So den, Timothy, kiip aal di gud wod ahn tiichin dem weh yo wehn hier fahn mi, wid di fiet ahn lov weh wi gat iina Christ Jesus. ¹⁴Kiip God preshos chruut tu, ahn tek kier a ih wid di help a di Holy Spirit weh liv iina wi. ¹⁵Yu nuo seh dah aala demde pipl fahn Asia don gaan ahn lef mi —dongtu Phygelus ahn Hermogenes gaan tu.

¹⁶Bot mek di Laad shuo ihn morsy tu aala di pipl fahn Onesiforus famaly, bikaaz dehn inkorij mi plenty, ahn dehn neva shiem a mi, bikaaz Ah wende iina prizn. ¹⁷Az suun az ihn get dah Rome, ihn staat luk fi mi, ahn ihn neva stap til ihn fain mi. ¹⁸So, Ah prie seh di Laad wi gi'im ihn morsy pahn Dat Die wen Christ kom bak! Yuu nuo gud, Timothy, ho moch Onesiforus work fi help mi iina Ephesus.

Di suoldya weh no gwain ton bak

2 ¹Az fi yuu, mi son, yo fi bii strang ahn tek kier a di gries weh God wehn gi'yo, bikaaz wi dah wan wid Christ Jesus. ²Ahn di wod dem weh yu wehn hier mi priich fronta plenty pipl weh dah wiknis, yuu fi paas aan tu ada fietful pipl weh gwain kiip dem iina dehn haat ahn den dehn tiich dem tu ada pipl tu.

³Yuu fi bier'op aanda sofarin wid mi tu, bikaaz yu dah wan chruu suoldya fi Christ Jesus. ⁴Ahn memba seh: wan suoldya gwain waahn pliiz di aafisa weh deh uova im, so ihn no fi get miks'op wid aadinary laif. ⁵Iina di siem wie, di man weh plie spuot kyan neva win di praiz, if ihn no deh fala aal di ruul dem. ⁶Ahn di faama tu —weh work haad fi mek ihn krap gruo— him shuda bii fos fi get paat a di haavis, no chruut? ⁷Tink uova demya egzampl weh Ah deh tel yu, Timothy, bikaaz Ah shuur seh di Laad gwain help yu andastan aala ih.

⁸Timothy, yo fi aalwiez memba di Gud Nyuuz weh Ai deh priich, seh Jesus Christ wehn kom fahn David famaly lain, ahn him dah di Wan weh God wehn riez'op bak fahn di ded! ⁹Ahn bikaaz Ai deh tel di pipl dem dah Gud Nyuuz, Ah deh yah deh sofa. Dehn iivn chien mi op laik wan kriminal, bot dehn kyaahn chien'op God Wod nontaim ataal! ¹⁰Bikaaz a dat, Ah deh bier evryting sieka di pipl dem weh God don pik, so dehn kyan get di salvieshan weh kom fahn Christ Jesus wid di gluory weh neva gwain don nontaim. ¹¹Dis seyin dah chruu, weh ih seh:

If wi ded wid Christ,
wi gwain liv wid im tu!

¹² If wi no gi'op,
wi gwain ruul wid im!

If wi seh wi no nuo im,
him tu gwain seh ihn no nuo wii.

¹³ Ahn, if wi no fietful,
stil yet him gwain bii fietful tu wi,
bikaaz ihn kyaahn disuon ihn uon nietyo!

Di workman weh God satisfai wid

¹⁴So den, Timothy, yuu fi kiip aan deh rimain evrybady bout demya tingz. Ahn speshaly waan dem fronta di Laad, seh dehn no fi aagyio bout demde wod weh no miin notn ataal! Dat no help nonbady, ahn ih jos distrai di pipl dem weh deh hier dem. ¹⁵Ahn du aal weh yu kyan fi mek God satisfai wid yu, laik wan workman weh no gat notn fi bii shiem fah; ahn weh tiich di pipl dem di chruu Wod a God iina di rait wie, jos laik yu shuda tiich'ih. ¹⁶Stie weh fahn fuulish taak weh no gat notn fi du wid God, bikaaz dat jos gwain mek di pipl dem stap deh fala God.

¹⁷Demde kain a tiichin dah laik wan stinkin suor weh no gwain get beta. Hymenaeus ahn Filetus dah wan egzampl a dat kain a wie. ¹⁸Dehn ton weh fahn di Wie a Chruut, deh seh di taim don paas wen di pipl weh aredy ded gwain get'op fahn dehn griev. So demya two man don opset di fiet a som biliiva. ¹⁹Bot notn no gwain shiek di strang foundieshan weh God wehn don mek aredy. Ahn di wod dem weh wehn rait pahn dah foundieshan seh, *“Di Laad nuo dem pipl weh dah fi him,”* ahn, *“Evrybody, weh seh dehn dah fi di Laad, hafy stap deh du dehn wikid tingz weh no rait ataal.”*

²⁰Now den, iina wan big hous yu kyan fain aal kain a dish ahn boul. Som a dem wehn mek outa guol ahn silva, ahn di pipl dem yuuz demde fi jos speshal okiezhan. Bot som ada wan wehn mek outa wud ahn mod, ahn di pipl dem yuuz demya chiip wan evry die fi aal kain a tingz. ²¹So, di biliiva deh, weh kiip faar fahn enyting weh gwain mek dehn bady ahn dehn spirit doty wid sin, demde pipl gwain bii laik dehn fancy guol dish dem. Dehn Maasta gwain yuuz dem fi du ihn speshal work, bikaaz demya pipl gi dehn huol laif tu di Laad, ahn dehn redy fi du aal kain a gud.

²²So den, Timothy, yu fi ron fahn demde temtieshan weh yong pipl aalwiez deh get iina. Insida dat, yu fi go afta evryting weh rait. Go afta fiet, lov, ahn piis, lang wid aal demde pipl weh kaal pahn di Laad wid wan kliin haat! ²³Ahn no gat notn fi du wid dehn fuulish aagyoment weh di pipl dem, weh no andastan notn, get iina; bikaaz yu nuo seh demde kain a pipl aalwiez end'op iina kwaaril. ²⁴Memba seh: di wan weh deh du di Laad work, no fi kwaaril. Ihn fi bii kain tu evrybody ahn tiich gud, ahn gat pieshens wid di pipl dem weh haad fi get lang wid. ²⁵Ihn no fi taak haad nar rof, wen ihn deh tiich dem pipl weh no grii wid im. Bikaaz mieby som taim God gwain gi dem di chaans fi ton fahn dehn sin dem, ahn kom fi nuo di chruut. ²⁶Den, demde pipl gwain nuo seh weh dehn wehn du, no rait. Ahn den, demde pipl gwain get-weh fahn outa di devl trap, bikaaz him wehn kech dem ahn mek dehn du weh him waahn.

Haad taim iina di laas die dem

3 ¹Now den, Timothy, yu fi andastan seh juurin di laas die dem, wi gwain gat som teribl taim. ²Bikaaz yo gwain gat som pipl weh jos lov demself ahn lov mony tu. Ahn som ada wan dem weh gwain buos ahn tink dehn muo beta an di ada pipl dem. Som pipl gwain insult ada pipl, ahn no gwain pie non main tu dehn muma, nar weh dehn pupa tel dem fi du. Dehn no gwain tel nonbady tanks fi notn ahn dehn no gwain waahn gat notn fi du wid di tingz dem bout God. ³Dehn no gwain kier fi notn ataal bout nonbady, ahn dehn no gwain gat non morsy pahn nonbady niida. Dehn gwain taak bad bout wan anada ahn huol wan anada laif chiip. Demya kain a pipl gwain kyaahn kanchruol demself. Dehn gwain

go wail if enybady get iina dehn wie, ahn dehn gwain hiet evryting weh gud. ⁴Dehn gwain bii pipl weh nonbady kyaahn chros. Dehn gwain bihiev wail ahn ful a demself. Demya kain a pipl gwain lov plezha muo an how dehn lov God. ⁵Dehn gwain plie laik dehn deh fala fi wi rilijan, bot riily dehn no waahn God gat non kain a powa uova dehn laif ataal. Timothy, yu no fi miks'op wid demde kain a pipl nontaim!

⁶Som a dem go iina pipl hous ahn tek kanchruol a dehn sily uman weh deh bordn dong wid dehn sin, ahn weh go afta aal kain a wikid tingz weh deh kanchruol dem. ⁷Demde uman dehn redy aal di taim fi jos kiip aan deh laan, bot stil yet dehn kyan neva nuo wat dah chruu! ⁸Jos laik Jannes ahn Jambres wende gens Moses, siem wie demde kain a pipl yah, dehn deh gens di chruut. Dehn no tink rait; dehn ongl pie main tu wikidnis. Dehn gat faals fiet ahn God don ton weh fahn dem, bikaaz dehn no biliiv rait! ⁹Bot demde kain a pipl no gwain get faar, bikaaz evrybady gwain si seh dehn ongl stupid. Ahn dat dah di siem ting weh hapm tu Jannes ahn Jambres!

Wat Paul tel Timothy fi du fi di laas paat a ihn leta

¹⁰Bot yuu, Timothy, yu wehn pie atenshan tu demya tingz weh Ai don tiich yo. Yuu wehn si how Ai wende liv, ahn yu nuo weh Ah wehn waahn du wid mi laif. Yu nuo bout mi fiet iina di Laad, mi pieshens ahn lov, ahn aal di sofarin weh Ah put'op wid iina di paas. ¹¹Yu nuo how di pipl dehn fait mi, ahn aal di persikyuushan ahn sofarin Ah gaan chruu. Yu nuo weh hapm tu mi iina Antioch ahn Iconium sity dem ahn iina Lystra tu —aal di bad tingz weh di pipl dehn du mi, weh Ah wehn hafy bier. Stil yet, di Laad ker mi chruu aala demde uova tof tingz! ¹²Dah chruut, enybady weh dah fi Christ Jesus ahn waahn liv rait gwain hafy put'op wid plenty persikyuushan fahn ada pipl.

¹³Dehn gwain gat muo wikid pipl, ahn muo pipl weh tel lai tu; so, ih gwain get wosa ahn wosa. Dehn gwain fuul'op plenty pipl ahn siem taim dehn gwain fuul'op demself tu. ¹⁴Bot az fi yuu, Timothy, yu fi kiip aan deh biliiv di chruu tingz weh yu don laan ahn weh yu biliiv aredy, bikaaz yuu nuo yu kyan chros demde pipl weh wehn tiich yu fahn di fos taim. ¹⁵Yo fi memba di tiichin dem fahn wen yu wehn smaal. Dah di Huoly Skriptyo weh tiich yo fi bii waiz, so yu kyan gat fiet iina Jesus Christ fi bii siev. ¹⁶Dah wehn God ihnsel huu weh mek ihn mesinja dem rait dong aala weh iina di Skriptyo, ahn aal demde tingz weh gud fi mek wi tiich di chruut, ahn fi mek wi nuo di tingz dem weh rang iina fi wi laif. So, di Skriptyo gud fi kaal wi atenshan, fi mek wi strang, ahn fi tiich wi how fi liv rait, ¹⁷so enybady weh waahn sorv God kyan bii redy fi du evry gud work jos laik weh ihn waahn wi fi du!

Paul taim aalmuos uova ahn Timothy hafy tek uova

4 ¹⁻²Wen Christ Jesus kom set op fi him kingdom, ihn gwain joj evrybady —di livin ahn di ded dem tu. So den, Ah deh komaan yu,

Timothy, fronta God ahn Jesus Christ fi priich God Wod. No stap ataal! Priich'ih weda ih luk laik dah di rait taim or nat. Ahn tiich yo pipl dem gud; kaal dehn atenshan wen dehn du rang, bot du'ih iina wan pieshent wie, so yu kyan inkorij dem tu. ³Bikaaz di taim deh kom, wen di pipl dem no gwain waahn hier gud, soun tiichin. Insida dat, demde pipl gwain go afta weh dehn waahn. Ahn so, dehn gwain bring iin plenty pipl weh gwain tiich dem weh fi dehn uon iez deh iich dem fi hier. ⁴Dehn gwain rijek di chruut ahn biliiv ongl suporstishan. ⁵Bot yuu, Timothy, yu fi kiip yo hed wid yu aalwiesz. No fried fi sofa fi di Laad. Du di work a wan ivanjelis ahn finish di jab weh God wehn gi'yo fi du.

⁶Az fi mii, mai laif dah wan sakrifais yah weh don puor out tu God aredy, ahn dah suun taim fi mii ded. ⁷Ai don fait wan gud fait. Ai don ron di ries aredy, ahn Ah gwain stie fietful til di en. ⁸Ahn now, di kroun weh yu get wen yu liv rait, deh wiet fi mi. Dat dah weh di Laad weh dah di Raichos Joj, gwain gi mi pahndat Die wen him kom bak. Ahn dah kroun deh, dah no ongl fi mii, bot dah fi evrybody huu deh lang wid aal dem haat, fi mek him kom bak!

Paul tel bout ihn haad taim iina prizn iivn tu di en

⁹So, mi son, trai az haad az yu kyan fi kom si mi suun, ¹⁰bikaaz Demas wehn lov di tingz dem weh deh iina disya worl so moch ihn don lef mi ahn gaan aaf dah Thessalonica sity. Crecens gaan dah Galatia tu, ahn Titus gaan dah Dalmatia. ¹¹Dah ongl Luke deh wid mi. So, go pik op Mark ahn bring im lang wid yo wen yu deh kom, bikaaz him kyan help mi wid di work weh Ah deh du. ¹²Ah don sen Tychicus tu Ephesus. ¹³Ahn, wen yu deh kom, bring mi jakit weh Ah wehn lef wid Carpus iina Troas, ahn bring mi buk dem tu, speshaly di wan dem weh wehn mek outa leda skin.

¹⁴Alexander, di man weh mek tingz outa silva metal fi sel, wehn du mi plenty bad tingz. Di Laad gwain pie im bak fi weh ihn du tu mi. ¹⁵Unu beta wach out fi im bikaaz ihn no grii ataal wid weh wi deh priich, so ihn riily deh gens wii bad.

¹⁶Di fos taim Ah gaan dah kuot nonbady neva gaan lang wid mi, fi stan op fi mi. Evrybody lef mi. Ah prie seh God gwain fargiv dem fi dat. ¹⁷Bot di Laad wende wid mi. Ihn gi mi strent so Ah kuda wehn tel di Gud Nyuuz tu aal di pipl dem weh dah no Jew. Ahn so, di Laad siev mi fahn di laiyan mout. ¹⁸Ahn di Laad gwain siev mi fahn evry wikid ting weh kom gens mi. Ihn gwain kiip mi sief ahn ker mi dah hevvn weh paat him deh ruul. So, mek wi gi'im gluory fareva ahn eva. Amen!

Paul laas griitin dem

¹⁹Tel Priscilla ahn Aquila heluo fi mi, ahn tel aala demde pipl iina Onesiforus hous heluo tu. ²⁰Erastus wehn stie iina Corinth, ahn Ah lef

Trophimus dah Miletus bikaaz ihn wehn sik. ²¹ So den, Timothy, mi son, traí az haad az yu kyan fi kom fi si mi bifuur winta taim.

Eubulus, Prudens, Linus, ahn Claudia, lang wid aal dehn ada bredrin, aala dem sen heluo tu yu.

²² Ah prie seh di Laad Jesus Christ deh wid yo spirit.

Ahn Ah prie seh God gries gwain deh wid aala unu. Amen!